

四庫全書

集部

欽定四庫全書

本堂集卷七十五

宋 陳著 撰

書簡

答戴帥初架閣

表元書

某近到邑湖山頭竺親手授書亟展亟讀如長揖清簪
特癰特之勞如親跋涉間關之狀至於出肺肝語念及
衰落風雨霜露使人感愴激烈某環山而走者一年有

牛與猿獠虎狼相出入幾斃者四五一家二百指分爲數處各謀苟活中間失一最小子老痛甚於割衣食之計爲過軍掠盡寒則楮火遇冬飢則藜藿并日而不足大畧自是而想而大痛處則又非言語可宣也滿目皆愁滿身皆病善脉者謂不可無藥力今爲何時死生修短自有天命恐不在此夏五方取碎累聚居於四壁下雖無旬日內無驚而入淺山即復者僅五六次又未保其往薄田以上稔歲計之亦可以粗了伏臘今歲又

無半收春間此事却可憂姑置勿論然終勝如去年也
執事以家依竹初亦云可也若欲就張村築屋則又可
盤薄矣第恐薪水之外正未能舍竹初而謀某所居與
張邨只隔一小嶺日可往返教游預為之喜昨于邑中
邂逅陳楸湯當宇宙之大變顏色亦頗蒼老而氣則浩
然可敬可敬關立可則日亦不知的在何處平生故舊
雲散鳥沒不諗何時再可搜訪赤松游處某亦一向不
復通書今乃知執事雖在城亦罕接云云

與陳監丞

元平書

某比知憑眷輒邀小隊曉登松竹關夜陪楮火論文之味到今腸肺間南山詩寵教眼前景道盡愧不能面謝而歸計已迫矣茲與同席次韻僭緘以呈辱大方一笑幸甚

答曹秋水

夢合書

某寄息庵幽甕窠凍坐本與門外事絕比為西麓一上南山又未免搜枯次其詩韻云云歸家守口如瓶身如

槁木自笑前日破戒書誨劃蜚存勞之餘謂有詩盈屋
豈為是數句弄醜耶用不敢外大方一笑近過軍入邑
境山中亦驚憂今幸其已無後隊諭及舍妹事敬悉盛
意應門善矣某兄弟所深知又奚待問櫟壽耶但舊絲
猶有脚未可聞命而或者又已有先斧聲而來叩者可
笑可笑此事乃夤緣尚俟異日而定永硯不克多筆非
簡也

與汪江陰

觀書

某近拜便中寶賜尊光煥然風塵為之辟易司門舍弟
家問蒙擲還已領乃事須某親到彼方定高見絕識下
采菲葑可以勵俗但恐太非偶耳有請在所修令弟摠
幹書中倘賜下乃詳諭東發書委折當俟面見悉其意
白之時艱未紓山間春自多趣德量寬平儘可相與酬
酢安得近州里時節杖履以從其左右哉

答王摠幹模書

某比者聯壁下照道遠愧未能晉謝溪山憔悴之身一

經春風披拂到今猶有生氣舍姪輩所錄羣從間鄙語
當已辱永鑑一分別望可否其旁以教之肯賜以棣華
集尤感尤感某當在後月同弟姪到寶幢以訣風議借
求雲闕一帖子即書示乃幸更不贅申令弟帥幹書怡
次為道再三忱

答陳監丞

碩書

某以宗盟托事契荏苒西別豈不欲問雁上天箋乾坤
至此山川淒然無從即社趾徒積耿耿耳書來乃知近

寓疊青又諗田武陵矣北風正急吹回南轅吾為吾鄙
三嘆息某四年來逃難林谷環而躋攀者百里而遠今
雖歸栖四壁下而生涯亦凜凜中間亦於避所失一小
子痛猶未定來謂知鯉庭亦罹此戚造物于危世窮途
加一等罰奈何奈何別楮垂諭感不我外但詩書正脉
未易祝續况寒宗又多闕此天其或者尚當在懷乏紙
不克復答

與余察院

浙書

某自宇宙晦冥寄命於雲山鬼神之交然未嘗不西望
星纏暗祝福履以壽斯文于劫火之中比聞以龜坑晦
溪等處為居尺一無便不得上令乃諗琴書以安於前
王莊所相望稍近特來有晉見之期風景已非月明猶
在兩心耿耿固不在言中也

與姚比院書

某苟活之恩不足為知者道但念舊日相與之真如執
事者能幾人而四五年兩處踪跡水流雲散各不得相

問豈本心哉聞里第風塵不甚迫花竹水木尚無恙否
時來未足定帖人生如何有涯亦惟得一日過一日耳
某環萬山而走者三年去年夏歸視環堵如風海破舟
不足以寄殘命彼蒼者天逢此百罹何日得過王罕嶺
訪諸故人雪涕而道艱闕哉凡事付之無言茲畧以書
候興居

答汪文卿遣餽書

某於執事相知深矣承平之時謂可出則上下四方相

逐歸則相娛老于雪壑水村之間于嗟時兮乃逢百罹
各天一涯逃形匿影時一出山逢人問存亡死活者數
載欲寄隻字無從首夏因間道之玉几下哭伯求回途
沂流花溪訪竹松佳處勞苦契濶為三兩日留此初心
也而弟姪輩牽聯謂離家日稍久必欲且歸遂抱此一
段悵快茲忽領賜書共審處傾否之變得習坎之亨與
家人同此大吉良慰下懷可當一番會晤餉我山海列
珍正方一家百指藜藿并日不足何敢動饕分外之想

登嘉惟時一雋永庶不虛辱厚意西風只尺又未知聲
燭如何臨紙三嘆若其小帖息則須卜過青修相對為
白頭吟也

答廣東發提舉震送本堂記書

某比尊旆下山一蒙專遣寺行一蒙寄徽都寺便兩尊
翰皆領訖亦嘗匆匆次高韻二首但發去後欲改三兩
字今錄于別方以呈近日雖收少野書渠自姚江取羊
額嶺回却不曾說却舟西延慶一節茲拜四書方諗中

途留連多日善達寓弟尉浣某不自量以堂記為
請中間朝武陵麾節馳遠遂稽稟取及今年夏初始克
晉謁又以風塵未息敢申前意而未敢望其速就也秋
末軒從忽下訪而某之後屋三間適成所請復拳拳尊
意慨然許可詎謂別未一月長鬚到門記文已垂責矣
焚香細讀根極理義之文某之心所自知而口不能宣
者盡發之于大手筆下節支雖多脉理自一如長江萬
里三峽之奇傾五湖之平放寬受而安流焉此天下之

至文也某何足以當此獨先人之平生潛者孔昭九原有知當如何為感此則某所以激烈至于涕泣也堂屏當悉如尊諱諭後日置之堂前堂後皆可但今年事力未及耳若求再寫却要分布亭當容纖悉計筭再拜以請未敢容易也况堂潤一丈八尺淨數以一丈二尺之屏其高則減此數尤便尊意以為何如少闕書一二日後當專發梨木此間無求處即書乃某欲特未辨紙只得遲待後一日罷頌醉魚鹽蠟拜受愧感

與前人書

某比自稟答謙施之後欲嗣尺箋良便既罕專遣又難
遂成因循尊仰之真朝夕弗置共想日來尊候萬福一
舅直閣著述必日新某杜門山深幸而官司以貧之故
過而不問而故舊時亦叩關燕笑問每出所記某本堂
稿以示相與玩繹降嘆以為發明透徹山川為之精采
况某之家之先世有光靈矣戴曾伯謂源頭活水衮衮
流出之文包宏齋似之某則謂包平行矣君變化闔闢

升轉斗量之妙恐非其所及也知者以某之言為然第恨事力方匱未能求耳寫入刻之本來年秋後或可經營比承發下台緘欲寄少野已令尉弟分付瑞便次第須自有回書來梨木此中難得遍詢獨溪口稍有亦無斷賣者如欲用則別訪可也近曾與黃子羽曹久可諸人相會否昨收剡友胡應之書謂唐景實之的子幸而稍長但不解事嘗事絕糧無所于食而其兄贅居姚江之吳擁富食以自肥畧不之顧不孝不弟有如此者然

則渠之得妻此妻從容溫飽不知世間有窮苦事使非
過位於景實之門能有此耶尊前與景實契非他人比
又與其子之婦家稔因能書一言及使其弟不至餓死
則景實之遺息在也亦使世間知具有巨源在也望深
入尊慮

答杖錫寺主僧

炳同

遣餽書

某比自一書緘之越翁一書令尉弟附達茲承蜚帖乃
知未曾關聽豈浮沉之耶令已囑尉弟詢之矣某與師

別本未久一落塵網自不能回頭清絕之地悵悵何有
可再到方丈借榻七日以是知前之留連真不世機緣
所示和之越翁詩中間用意于吾輩甚拳拳世道瀾倒
儕行自不相容而物外襟懷乃獨寬綽無遮礙如此使
人感烈無量玉甚乃山川精氣所成況生于浮雲之上
積雪之下豈下界人所得垂涎者忽焉我施或其食玉
芝而生羽翼當時往來雲南以報不忘也因謝發一笑
焉第玉涎雪樵皆寒中所需珍餽一入門而六花舞冷

甚勁尤慰所乏但過為衣鉢中費愧受憎感片雲何時
出山一番或可遂會晤之喜草草奉啟悉儲嗣既

與戴時芳

方書

某比聯日夜獲接雪白之色冰清之輪至于燒楮火
酌茅柴酒席地而坐自謂今之世而得有此樂恐不多
見菜羹飯後溪頭之別幾不忍回首與君居僅隔一長
亭地暫離便自作惡如此正亦不自知此心為何心也
偶有某物為午酌荐我輩寒相當笑留之

答黃東發書

某自比蒙賜書謂郁丈將下訪朝夕以俟竟未見到頗疑其何為遲遲及初八日拜領尊賜之書乃知郁丈已自回城而書留寄于使錫遂于初九日遣人去取至初十日晚回既獲敬觀前所遺兩寶緘中間曲折又見令弟子羽丈真情甚白感激尊念主維之功雖尚遲定盟而道誼之氣已薰洽于胸中至于家人間矣但娶婦嫁女之禮各隨其家所有為之今亦只以用兼雙釵一副

為禮不復用時花等以小箱封前此後凡百只是從簡
非惟兩家皆便而好為循俗事亦非今之時所宜所謂
親期本心其欲速今當以三年為約庶不違令弟之意
某家于婚姻事粗行古禮世之不合于禮甚者皆不及
講尊意必以為然後日當令廿四舍姪面稟其詳夫媿
人倫之大者昏禮不可不嚴盡被世俗無知之徒淫奢
之俗敗壞以極不可不自知去取也成終成始惟門墻
是願多言何足以謝

招單君範庚金教子書

某自入谷循溪尋桃源別境因獲回曲巷小樓松竹下
讀書聲某揖風日之清美話雲萍之契濶便欲卜隣未
能也出山即為平地風濤掀顛尺紙不上涓房惟有夢
思嘗飛越左右然不如朝夕會聚之為暢洽也某近者
令舍弟有不量之請某諸兒頑鈍重以連年奔走山林
逃難以為苟息活遂與詩書相失先世一絲經脉凜凜
乎莫續若曰待天下事定然為後計則水流已下蓬遂

其曲何日可回哉故莫急於得師廢放已久將愈難為
力非大匠規矩之不可是以惓惓以屈致為請高誼特
達畧不他問一諾千金見之所答舍弟書中者粲然今
而後知諸兒有不辱襟裾之日某之親炙光霽又在望
外其感幸當何如敬龜改歲正月十有八日設席以俟
臨責當先一日遣輜詣廡下區區束脩甚愧非禮舍弟
已詳白之茲不復贅知我者草木臭味諒不復訝其諸
願言悉容面既

答許宮講書

桌書

卷七十五

某三年前有約問桃源路既而驚奔各天一涯去年稍
定即徧詢福星今照何地而莫知其的冬十二月初十
日忽拜數月前所寄書讀之喜極而淚造物者不絕吾
道之脉猶得以苟活之命見君子也乾坤納納風雨瀟
瀟習坎心亨邈世无悶于此可以觀人矣某與妻子僅
完其軀猶于避所失一子為病中藥食無所切得以至
于天痛猶在心奈何若飢寒之迫聽諸天命何日得會

面叙話一番瞻望雪指咫尺千里有便且時節寄者以慰彼此之拳拳

與徐麟卿攀龍書

某比造門話姻婭之綢繆謝子女之栖託乃過為厨傳之擾至於揖古貌聽古言如見壘洗于盆盎中此樂又非書尺可喻也

與張師道制幹書

某自癸亥秋稟別後交書者數四及嗣春音問遂濶遠

前載嘗託隣寺住山德周者寄一書今春又因范著林處云其間當有便到嘉第二書未知皆得徹幾格否書中並無他語惟畧及年來苦事與問台候暨尊眷平安耳聞福躋自赤城回但見舊潭為焦土遺物皆散亡獨田園尚有認占此著林諸人之云云以書報某也據僧德周今就小菴居頗適尊眷想大難之後已遂安樂今嗣今必已入學講習爾後曾再抱熊石菊坡先生諸郎今皆無恙否今居城中其郊外耶會時望為某再三拜

意不及一一作書某兩年方自萬山中出居故廬夫妻
幸苟安四男三女幸無他但衣食之資一空於數次之
過掠無以自給然回顧世間離亂散亡者皆善于彼多
矣皆造物之賜獨三年前喪一子于避所今姑置勿道向
日之同寅交舊皆不復知其存亡惟閉柴扉苟全性命
所幸官司以甚貧不甚聒撓特未卜方來又何如也若
以某與執事契誼如許當專一介詢問而無力可遣只
得搜便附書浮沈固不可必豈無一次所附者達耶天

遠雲飛目力斷而心心遙遙臨紙悵然

與單君範書

某生不逢辰心事難照瀟瀟小壑琴書肯臨昕夕聽教
如風雨中雞相應如霜月夜鶴相聞滔滔者不入耳別
來能幾日雲飛西水東涯夢與往來已極耿耿門牆秋
事度已就緒翩然過山予日望之

本堂集卷七十五

欽定四庫全書

本堂集卷七十六

宋 陳著 撰

原闕

欽定四庫全書

本堂集卷七十七

宋 陳著 撰

書簡

答張師道制幹

某十二月十二日從范著林便領賜帖備知台候詳悉
且諗尊嫂恭人玉則粹溫東閣郎君又見就學皆所慰
快者也陳宰某于行都相與甚契蔡丈亦嘗親炙之陳

瑞卿又是舊友，悉望為我拜意。某家貧，因燬餘架數椽，庇風雨，遂坐窘者已三年。然信天公亦未嘗餓殺，但有時與家人忍飢自笑，又自解釋，既要屋住，又要飯飽，今何如？時有此滿足緣分耳。時有拙詩，山林友朋見之者，和輒盈軸。今早忽有人以詩來者，記其中間隨韻有兩句云：熟眠勝醉酒，清慮當焚香。又兩句云：靜見蝸爭國，窮知馬福翁。又兩句云：時把詩題壁，多因病在家。又兩句云：問闕諳世夢，寬綽養天根。又兩句云：灰風吹劫火。

國事付回潮此今日工夫以發千里一笑若更有飯有肉又將亂話者多但恐反無暇及此某穴處難寄信或時蒙記存乃錄以歸七兒女拜尊嫂起居

答張書監

大圭

某時維春又如許物無盡情恭惟某官視時卷舒有神翊扶台候動止萬福某幸甚積有斷金倚玉之契不獲以隻字道契濶朶雲劃飛喚起倒置之愧萬感不足蓋也尊執事以斯文宗匠吾鄉老成朝市歸來林泉味永

某以不獲忝聚為欠其愛助之真浮雲往來倘知之耳
某自一入山林謝門外事今年已七十有餘病日以攻
況垂罄之室無煮石之方待盡奄奄命也誰咎某舍姪
孫梓椿娶令妹與令甥皆宜其家家雖貧或其有興乎
此又難以言語謝萬一令季年丈想亦家食自安晤次
幸為道忱老眼昏花執筆又顛申復稽遲

與王仲正

儒雅

某昨便中修狀嗣拜答緘獲諗讀禮有嚴外事不撓良

慰渴企及今又閱數月迢迢耿耿旦旦弗替切聞支持
毀瘠龜吉牛岡將啓先正親翁提舉寶章吏部之叢安
悶幽室而以先令兄親家之窆附焉某托盟肺腑非他
人比雖曰視筋力為禮其盡盈坎敬則不敢以衰老廢
屢于左右訊其遠日竟莫得其道阻且長又難于冒
昧而重念身及見祖遣之奠要以面銘旌手執紼生死
之際固相去而未為遠也使其窆窆既歸九泉之隔將
冥冥者愈茫茫矣然以今觀之葬期終恐不知會葬終

恐不及平昔骨肉心腹之義當何如其感愴當何如其
自訟無已則有世所謂挽章庶乎寫欲言而慰長往不
猶愈于奔送不及而遂愀然者乎因忘其淺陋進于先
正親翁先令兄親家靈几如兆域已備導翼戒途或辱
卑之些卽引北風而哀陳之是某形雖不前而心亦粗
白明年春氣稍深尚可就墓下而奠生芻固與宿草而
不哭者不同也茲有薄賻介諸別疏更不作令弟令姪
書

答張師道制幹

某是月十九日領閏月五日所寄書恍如對春風顏面
不知有千里莫雲之隔也惟是獲稔台候偕尊嫂安人
東閣郎君子危世享全安之福為慰之至浙右儒家皆
延引斯文之澤而執事又有鄉校有盟是可無他恐矣
又有朋友相過書籍相借田園尚可葺理亦足以樂吾
樂也某雖閉門甚牢不接外事或者同天之祐隱然自
浙右來姑由而不知耳諸兒自不廢書但為齏鹽所迫

不無暴安某亦哀甚病脾日深無藥可治此等境界要多活何為特長兒雖已問東發姪女次女雖已許嫁其長孫而未能畢事勢是明年冬當思別有以處之東發及其長子皆已泉下歸矣其次子與其孫却能世其學來諭某築室不過三間外是風雨蔽者不滿一哂某自以為人之處世為有餘但家計素薄不堪此費故為所累然非此亦無僦借之地豈得已已今年猶可過閏嗣歲

關

夏稅有田不滿五十畝固無甚慮獨是十餘世

墓山千餘畝皆是某輸稅此項却墓田未便盡鬻所有之田不足以了一夏之輸此則大窘耳辱賜教新詩皆見識中流出如月下水雨後山新機自大異浮動頓使老晦亦有警省某積時有數詩錄去請教云云聊發一笑非敢言詩緣千里相隔亦以見契濶意耳陳立可去年曾收書在家聚徒甚得所但其家死于兵者甚慘今事已定矣

奉文本心樞密

某託根師塙敢于拜狀畧去長敘首祈鑒宥某歲裏仗
錫住山同少野自寓里歸蒙賜答翰窮山中捧讀光符
熒熒挾春風下施問閭衰老之蹤忽動生意是造物之
舊不隨世變而變也第地薄瀛濡兵車樓船之所會上
之應酬者日繁下之出力者亦為之日不給雖寒酸牢
閑柴門有不得穩寢而安食者况方來正未涯殘息猶
未保望龍門徒耿耿耳鈞諭慈湖先生訓語家間舊自
有之年來兵燬之餘無從其故近嘗徧詢之鄉之故家

亦未得此更當搜訪或刊本或錄本續附便以納少野
為其師請銘某為致其忱實是僭越而鈞慈慨然一諾
某與有榮耀且聞當時大手筆即欲揮授少野為幹且
急回茲方申禱祈領某因得就便書恭聞風塵境外
水晶宮中獨鶴在天與冥鴻俱遠吾道尚有賴焉他不
敢上起居左右少野介旋或蒙賜以數字感甚感甚

與貝斗綱

某比如城哭令弟之逝因近得握手連牀敘情話者數

日春風時雨暢洽于中有非世俗所能喻也別來耿耿
本擬即修箋問而還家病風濕所搏日事藥鼎到今猶
力弱氣短此等光景更堪心力事力有出于饘粥之外
者耶兒造于衰老貧困偏工簸弄殊不可詰執事寄蔗
境于同氣之室若亦不便于平泉之花竹者然東閣溫
其如玉怡承無違且朝夕有含飴之樂人生如浮雲流
水安有據此心苟安處處家吾知雅意足以綽綽門外
塵埃姑置勿道先令兄葬期已定否某今雖獨得柴門

任風開閉茅屋盡日虛閒鋪湊粗茶淡飯報答流水青山但知世變終可畏一鼎安得有涼處亦惟得一日過一日耳姑此以發一笑

與史猷父節推

徽孫

某啟末詣見辱所以篤氣誼者甚至雨窓流連尊酒論文之樂不知門外有今世塵淖別來又秋風矣尺紙不上几格非慢也比還家病濕兩月餘近方平復而未去藥盡老而貧豈宜有是命也誰尤惟是話邊許以近作

箴銘諸文錄教當時為拏舟歸急不及請取到今雖夢寐中猶能記誦數語而未得其全茲敢以繳司籤者付授來奴宇宙冥冥斯文岌岌執事獨以所學高誼自植立為遠者大者計恐日迫西山莫見遇用之日耳爾來有何新聞皆望密報山林深蟄本不欲問外事然區區亦欲畧知者蓋未盡以前能無飲啄之累乎

與王德玉

庭藻

某與君只片雲隔別去便動是歲月渺渺予懷在月梁

左右勿置也日來門外事多望清氣當自辟易第高誼
素為仁里倚重恐有不能盡避者耳某老而衰久矣比
因病益以疲弱行步不能去杖惟匆匆枕書作崦嵫夢
也近因得二句云苦兒知學何妨瘦老婦安貧未覺衰
但適有敗思遂不及足成之姑為知己道當辱一笑自
度會晤未有時因書寫區區者上几格猶愈于杳不相
聞

與史猷父

某近領謙答之緘臨風三復如月露瀉秋心下清快欲
教以高文乃知謝庭方展有客之席未暇及此尚鬱吾
望也垂諭舍弟觀往教事自非道義之襟念到酸寒何
以拳拳如是感烈感烈但畦芷西席雖某兄弟間所願
依者夙而家叔年高相去三百里難以遠游比聞諸戴
帥初謂欲以表竹初之令弟令壻之館為薦且嘗謀諸
執事矣倘可以此終成之則一水之便又朝夕得與芝
蘭同味亦良機也敢求贊決某哀且病日以多睇門牆

徒耿耿書不盡意

與史允叟

公升

某春末嘗詣寓廡求一見以敘契濶適值車馬不閒伺
之移時而後委刺閤人能為傳下意否迫歸弗克再晉
徒積遙遙耿耿之忱耳近聞鳩工孔殷燕厦垂就以雲
霄門闕造物者曲授再新之規繼志光前是可羨已然
酌之以時約之以度當自有心匠也某貧不能致一縷
贄虹梁之舉兒郎偉則望之拳拳矣

與王子羽山長

翔鳳

某自城中拜狀環翰隨青光風霽月見之辭氣間使人
心暢而神悅長兒深以不肖身執壻禮于門墻饜飫詩
書正味深入髓脉毛骨亦化此某惓惓之初意第飲之
食之上累廚傳者久則跼蹐為甚茲敢以真情白某淒
其家事藜藿併日乃其常耳魚美味重自是待王孫之
具慈湖果酒三行菜羹一飯是為本色徐毅齋云莫啐
鮓徒使我輩無以繼某之此語世俗聞之必曰不情尊

意高明必蛩然而笑領也歲除深本當歸家一番但今
冬酷冷水陸皆艱已囑且待開正稍和而歸愛其女必
及其婿當不以吾言為辜愛也某雖貧幸無官擾皆雲
芘之逮彼月斯邁相隔望阻長草草尺箋候問次兒淪
附拜起居荆婦就上尊嫂多祝福之祝

答前人

某比拜環翰之寵信宿而新旦矣流俗親舊間以頌為
禮某于今則不敢非故行簡所恃有知者在正月以來

光風以煖之時雨以膏之無日不受賜二百里猶對面也茲惟仲春恭惟生氣滿庭斯文在袖門外芳事分付蜂蝶幽懷自韻綽綽有餘裕也某欠死之身今年已七十無復顧念況長兒深獲壻于屏下有典刑焉有詩書焉以不肖之姿朝夕漸漬熏炙未曰速化若曰小人之歸庶乎其可免此則某之大幸而無所容其喜也特以時異勢殊清風門墻應酬當自不給而久為廚傳之累簞食瓢飲今人莫辨者比屋深書乃報以日賜飲饌亦

未嘗苟當何如其跼蹐三月言歸之諭本當拜命然慈
抱之于壻愛之誨之有甚于其子者世俗求其一而不
可得今乃兼之敢不體承此意却容少遲又請約束也

與曾南金制機

銅

某戊寅歲嘗寄狀續走便回乃諗奎壁高躋湖外却辱
東閣領下此後雖知同一齋還越而尺箋坐乏便不暇
裔上伏想近年以來從秦烈焰之餘存魯靈光之舊
近則泛鏡湖扁舟浩蕩遠則入蘭亭樽酒夷猶俛仰兩

間感慨百世悠悠然水流雲來往也東閣穎拔華流能
世其家夙所敬也爾來又非吳下比恨不得一會見以
快老眼或傳時異以來僻隱屠蘇今已歸築于禹跡之
左右否故人滿東南生死存亡無從可問獨執事相去
為近而書訊猶若是濶絕蒼蒼者天豈初志哉某今年
已七十眼昏齒疎待盡未盡妻啼兒號雖欲恣然而未
能忘情長兒深是黃東發以其姪女妻之兩窮相遇猶
在妻家未得取歸次兒潤女已許東發長孫而無以遣

次兒淪次洵皆執事與台嫂所熟識者餘皆遠膝虫虫
但曰飯飯不知有粟棗可覓也去年常亂道八句其况
味大略盡見于此參差梅竹槿花籬強對溪山傲百罹
終日書聲清屋氣云云聊發一笑茲聞汪甥與春為越
上行特令晉拜面說別後苦事蓋欲筆之紙而眼花不
能究所言也荆婦領兒女七子附拜意尊眷上下

答竺梅潭

自中親家

某望梅潭隔一翠峰塵影役役尺書落慢域亦恃西來

風備諗和鶴之鳴幹蠱者力得以怡閒適靜蔭茂濯清
皆福地也因自慰其渴仰若譴以世俗濶疎則何所寬
罪而箋教之蜚乃謙抑過情如此喜而感而不能無愧
愧蒲萄為餉是為津老叻搜枯腸之劑拜賜舉室春意
某薄下春隨動皆病老荆哀憊諸兒又無生可業門外
事且日有危證良可憂也今女幸能從夫相安于寂寞
淡薄此老夫婦之願亦謝庭宿訓之及今之時惟朴素
以安其危勤儉以相其貧或其可也否則趨世妝競俗

好吾笑其春漸朝露其能久乎此意惟可與高明道

答孫將仕

易

某舊夏釋屨平泉左右甚欲與先正提刑大監一敘十年契濶而親藥方厯竟勿獲詣龐公牀下獨荷執事繼繆盼接猶謂先正勿藥有再見之期不意長白之駕遂以不返某衰老重于過山生芻以奠尼而到今專書之責則知佳城既龜遠日已屆韓銘且不鄙賜示矣喚起積慚萬罪奚贖第筋力雖強盈坎之列坐成廢禮草草

此章不能發揚先正平生毫末亦以見此情而已布紙稟復不敵隆施臨風黯然

與王子羽

某以危世衰年幸為兒深壻門墻下自合時節聚晤挹漱道義文字之津庶不虛擲蔗境淒其阻脩有志莫遂至于尺紙敘繾綣若易易事亦墮渺茫尊嚮寸心耿耿愧可知已今年又夏共惟家林桃李綠陰青子當不減舊時風景特恐天荒地老物怪人姦囂塵沸沫不能

不到左右然既見王彥方將自慚縮而退而坡公謂為
醉人所摧罵輒自慶慚不為人所識尊親家亦惟聽其
在人存其在我而已比聞琴書欲復如城中又非前日
矣色色皆難未必便于枌榆也今之為計果何如某年
來脾瘕益深朝夕攻刺良苦又凡一點風露之薄眩視
戰嘔繼之以寒熱如瘧皆哀極之證其能久乎頗知德
履亦時親藥餌而某以多病告豈氣味之同而陰陽之
抵巇亦同耶何時稍健彼往此來相與話情一番面清

風目浮雲把酒論詩使旁觀訝世上猶有此兩翁也山中未有一物以見遠意

又


某馮介眷隆輒自稟請某自昨因先君之志築屋三間以庇風雨先令兄國史吏部為某記之屋末也而斯文足以為重也某非其人也而先君之所潛者耀焉某不敢不敬特遲遲其銍諸堅者意則有在仰惟尊親家墨妙若一世如夜光明月人望之而不得即幸而有連倘

肯為某命筆先令兄之文當稱光某之所本于先君者
庶其免不孝之罪矣敢因以徼福于研席頓首頓首其
餘蘊更戒長兒深拜瀆

答竺梅潭送良女彌月

某崦嵫殘息百皆逢懼獨獲與古道交姻猶自慰足第
書問稍疎方此悚悚雲箋又賁其中皆春風時雨把而
味之不知窮簷之有冬嚴也尊親家不欺者三其樂也
獨今為何日而忠厚之氣使人感化惡聲惡色不接于

耳目又有東閣如此其賢以相羽翼某固已夙敬比兒
洵叅晤歸來備言其然益以信其為里之仁而某愧未
得左右周旋也某七十三矣令女一索而得女女亦孫
也倘未露晞猶有含飴之樂喜可知已月彌筋麪尚堪
徇俗乃累盛心辱賜柔毛吳禽玉塵臘釀錫橘之頒禮
何其侈意何其厚登受無著此愧處況此等時節親戚
間一書往來足矣一芹以為過茲乃若是其浮溢實是
不安新婦領諸兒拜親母安人起居并謝



本堂集卷七十七

欽定四庫全書

集部

本堂集卷八十八至

詳校官庶吉士_臣李傳熊

主事_臣呂雲棟覆勘

總校官進士_臣朱鈐

校對官編修_臣嚴福

謄錄監生_臣金彥茵

欽定四庫全書

本堂集卷七十八

宋 陳著 撰

書簡

答白廷玉

璘

某七十三歲矣。欠死之身。猶累薇蕨。豈不爾思。山深水
長。一星同夢中過也。今年八月二日。趙也一轉。以所惠
書來。契濶之餘。如大醉之復醒。至於慰極而汨落。惟是

塵埃方眯目塞耳而所示之作非復吳下語而後山月
下水本色上有新意手之口之不置頃刻又聞賢內靜
修不事世妝盡出其所有以資日用雅懷遂得以緩步
晚食與風朋月友夷猶湖山間誰之賜也況乎絳帳近
家而主人素以賢聞川雲飛泳當有便處所交半山朱
丈吾固知未及識如瓜涇沈丈抱甕馮丈皆所夙契今
知其劫火不燼尤甚慰滿會間幸為拜再三意苟活山
中所謂文房四物歸烏有者久矣坐此不及作書須及

此意庶免其罪我也吾生理素薄自世變以來驚擾奔竄聽其所掠蕩無所留而巢居穴處者數年飢寒交迫無病亦病中間一子亦甚可人坐視其病死天乎莫之訴草衣木食苟活到今四男子二已娶四女子二已嫁皆自窮者自相遇今年愈不可支雖欲作魯公帖而无可乞之地雖欲使二三子謀館而世方掀舞聲利視詩書為何物悠悠年歲凜凜溝壑意欲遣一子過江以濡轍涸然時異事殊江空歲晚以棲棲之身誰其舍館誰

其綈袍誰其推食哉更當深思以決知其為我等之
若曰謀士則非才不敢也來謂舒氏今如何問之其叔
太博津云有一男子碌碌苟朝夕其女則今無之興到
念此真是古道可以媿死薄俗詩教良侈老拙輒用韻
見意三子亦復後最小者方八歲未能及此一番作字
當見面一番不問詩如何聊見繾綣耳流問到家人尤
感家貧累重愁深病多衰甚矣就致意賢內愧不能辦
一芹寄遠爾後有便千萬續此音信茲仍以書就浼趙

也一以達眼昏手弱幾不成字回看米絨有如此紙有如此墨猶可彷彿承平也對此重為感慨不宣

與王廣德

槩

某老矣而病乘之貧矣而累困之崦嵫之光溝壑之息尚當問人間之事耶獨念尊執事於某為何如契世事雖殊兩山相去百里而近及其未死猶當時候顏色以見風月故人之誼諉曰筋力不前書問亦可缺乎乃今閱數年而一字不上几格終亦不免為老與貧者因

循之也尊執事青山以友白雲以家或者見之謂能自
樂其樂如此然豈知其非初心哉殊聞對古聖賢無雜
賓客退修密養有韋布風味而盛丈正卿實主而塾以
雪中之長松交山上之碩果此道在世變外某惟望而
起敬耳今忽聞先令兄韋軒判府歿且葬矣某為知之
後遂廢禮一書及詩煩屠仰之丈轉達承奉非敢以是
盡贖不敏也來侍次更為引此忱幸甚幸甚本欲拜盛
丈書有傳近暫還鄉者姑留後便

與王江陰令子

某死罪死罪先正判府寺丞以某為太師門下客辱交
最後時不我與莫能自見萬一以答知遇避世以還一
往來之燈前勞苦猶曰儻有時也既而先正西入山路
益以遠書問益以曠或傳老樂天卧痼日閱岐黃之書
而某忍貧多病少出戶限莫造牀下一詞候近得屠仰
之報乃知棄人間已久且於良月三日歸定牛岡矣相
望无二百里亂後不得再見面死後不得一奠束芻葵

之日又無所聞不得一執紼以送流俗瀾倒交情日滴不自意某與此輩滔滔也共惟先正清不求名和不失實公休之風如父原明之仕非心此君子之言也逢時不辰捐身无路奄與夷齊為地下游世變自不齊人生自有死惟後之人多賢則可無憾茲者獲審孝忱純篤承先志謹終禮襄事之日一於行古識者交口傳歎惜不在會葬列一與觀耳因念昔從東塢詩禮庭前接玉雪氣貌儼然成人已必其能世其家斯今信然九泉有

知先正其妥靈矣區區二詩追輓雖不與歌薤露者旅
進猶愈於見宿草而徒泚其頤也墓廬之下輒一慟以
白敢望而不敢請未間敢冀祭禮之讀祥琴之御凡皆
加於人一等某僭越僭越

再與王江陰

某洊有忱稟昔先平章太師之薨某是時逃難萬山中
風雖有聞而以所服就門人列苦於無路謂可待襄大
事曰以拙句道萬一行哭弗前以導舉筵而世事愈棘

入山愈深失於探問年來路可雖通而筋力已不任遠
言念翹才末至受知不後於人日月逝矣當何如其感
痛哉二詩猶在心特以非時不敢寫徹令叔父判府左
右惟大孝服次或不以為訝敬錄以呈庶見某於師門
不能自己已其懷者如此而詩抑末也某媿死媿死

答胡景叅判機

三省教授一字身之

某山林多活之癯雲萍相濶之久婚姻事忽焉有成一
笑問天顧我輩何為如此其侈此喜流俗所不能與問

名以啟將之禮幣自當僕僕亟拜重以妙墨珍題骨肉
肺肝之語如春風時雨使人暢洽而莫之能名此又出
於望之外也某即日恭惟寒放晴慳遲得春好憩物之
表味道之腴與謝庭芝蘭交昌文氣荆婦領子婦輩羅
拜起居

答胡表仁制機

元叔

某每念尊慈於某甚于親昆弟吾姪于某愛之扶之甚
於母與子心欲以一女托姻以永繾綣之脉而時忽其

異各為深入山林之計且川陸修阻遂睽此志至於詞
候起居之書亦缺焉不及講自謂畢此生無分聚晤矣
人也有天焉令姪儵因徐甥情話未及某季女為令姪
孫執箕帚寅緣乃在今日躍於承好逮之命女醜拙而
不稱其偶家淒涼而以無裝有不暇回顧而拜辱於一
語之下所自喜者令姪與某同袍非他人比尊姪與吾
姪在上又夙知某生事荆布或可入清門旁觀或不能
笑議不然則尚有凜凜于方來也荆婦近亦多病苟焉

朝夕有四男子上三子聊借殘書為生或坐館或在家
無足為尊上道最小者方習童學大兒婦次女皆是黃
東發家子女聯姻是東發在日自來吾家成此數親但
兩窮相遇未知所涯然世事如許貧富固非所問姑聽
之造物者荆婦領子女拜姑姑安人起居某年七十有
五眼昏手弱書不成字有懷如海難以筆殫

與白廷玉

某白久不相問豈忘情邪雲飛水流皆眷眷處去載趙

也一來知欲寄我書而渠不及領甚悵於失此便日來
想隨所寓皆安好世事可憂人情日薄惟高誼如金石
可敬可敬吾家累重事多昏嫁皆未能了而老我衰病
良極堅忍待盡造物者冥冥不敢問也夢想北橋風月
西湖山水徒老成泪惟健筆雄詞逢迎收拾必有深趣
或承便中見示亦足以一洗老眊茲聞便草草情照幸
甚八月望日

與趙提管

崇煥

某日竊雲芘不敢時以書瀆天乎何意災我鄉國而槐
邃亦在燭煽中聞之重為之愕愕斯文所寄書冊琴爽
想是无恙棟宇末也當置之念外第不知今寓何地吾
輩方坐天窮又罹此變金玉間皆然望為我拜問忱
范著林間家既燬其敢器得存全否其令孫女已歸之
名閥否亦嘗專尺紙詢問其凡百更无尋處復又攜以
回或會其令孫并道意尤感某衰老艱於遠出輒布數
字候起居

與史猷父

某積仰中正欲貢尺紙于五雲閣乃有城災變之傳旁
詢之往來者獲知潭居自有福星全護不過震隣之驚
身天禍吾儕可謂烈烈而斯文所在與始焰能隔幾何
儼然猶魯靈光也則陰有意在矣某又私為之自慰某
衰老不可出門始作此拜詞眼昏手弱幾不成字

與孫主簿

焱

某比歲晉見辱不以疎濶訝錯落笑言紛郁燕遇使人

眼開心動露霄聞鶴秋空數雁不足喻其爽豁感何又
當何如嗣嘗便中道謝必徹聽瑩某一嚮杜門百事俱
廢不及頻詞當沐照以度外即日夏五恭惟履福糾萬
蓬眷祉攸同門外事想談笑而遣也某平生抗拙不喜
生產有四男子錐刀之資既空於丙子之過軍中間勉
為兩男一女了昏嫁薄田幾何日削月割以紓一時之
急有不容計其後深輩株守故業無所於用淒涼相嚮
而已闔門二百指罄罄仰食望春貸粟于今六七載矣

今春二月四境不靜隣震孔迫不免挈家入山未幾邑吏輩乘時相脅所藉為半歲計者盡粥而應之無遺餘頭顱如許窮困過極堪復罹此禍耶蓋不知者以為出仕二十載不可謂貧而疾其退藏而寡與者煽其吻之毒而焮和之宜不見舍於此輩捉襟見肘徒累有識者之所憫悼忽官自上來者不待有辭首自撻發其奸必欲窮治此事而流連證對勞費益重並不能支然又安知之必殊虎之必斃方來正可凜凜某去載一病

死而復蘓者三今載心病又作藥食之念已絕氣衰形
露非復舊相見時也

與俞景周架閣

湘

某比獲交書涓房今又成渴仰世事日以漓友道日以
散窮山剩水之間如吾與執事猶得以數字相訊問亦
以為幸寓第是懿親寓里是善地服隱者服學希聖學
聞於易尤詣衰老有健羨而已為高山翁為老伏生皆
足以昌吾道也次學生瀾再到婦氏家必有幾日留可

以教者勿金玉學不可為無師人不可无徒開其門而
示之堂惓惓是望令叔默翁閉戶著書近相尊安幸會
侍次為道意某今年七十有六矣相去有百里而遙欲
一見不可得已茲因淪行草草布露萬一

與王東之

某望門牆隔萬山諗興居在諸友比應之有書來謂飛
霞佩將御西風而東下矣予心望之胡為又尼豈為他
有未便耶某欲一見叙舊話新此懷如海夜灰煨芋春

雨剪韭尚堪為知味者設儻踐言為賜侈矣某亦圖與
應之仰之諸丈相會一番以送殘陽而衰病脚弱睇剡
嶺已顫怖恐終莫之遂亦大欠也更看造物何如次兒
淪往婦氏家已戒其晉拜丈人行一識古君子顏色淪
亦頗嗜學有可以翼而進諸左右當不為藉湜輩之可
疑某之惡況淪皆能道辱垂問當无隱草草夔夔

與胡應之 泰來

某昨蒙便中賜書隨已稟答當無浮沈執事遜世無悶

又有令子能壽其學可敬也已但聞仙里今秋歉于旱
乾負郭田其無損否不然則憂方大也吾徒以殘息蹈
危機一落千丈強矣但區區欲與執事及東之仰之叙
話一番以始終至平生交契之義而近為家事關心病
多衰憊一動亦難事且環數百里告飢遠道亦未為便
坐是尚未能決惟是東之比欲下顧其喜非尋常比今
胡杳然次兒淪到婦氏舍就戒其晉拜牀下併東之仰
之二丈處亦要其知某平日之心腹交如此其人或者

援之教之愛存之猶藉為通家子弟之末書不盡言

與屠仰之

某與執事為何如交今乃疎濶如此而書亦闕然此心雖不為世變所動而人事亦不免于此而有間惟想望肱枕躬耕其樂陶陶且東之應之光叔子長諸賢森羅左右瓶罍翁之夜粥笊坡老之春膠說隱況講故學綽有餘裕某則穴處一室誰與為友惟有殘山剩水衰草寒烟相與感慨雖有一達觀尉弟可以共此窮寂而渠

亦困于藿鹽生意斬然時一見之則忍飢而相對泯默而已吾輩尚可以會晤一二日否已於拜應之書中說及茲因次兒淪到其妻舍就戒其晉拜淪有志於學有可以資一飯以活之者闕

與竺梅潭

某久不交几格書然起居候則風雨西來時音也近相邂逅得趣幹蠱有賢非如某之貧而罹患難老而坐病痛日與家人區區謀朝夕者比剡中佳山水固某桐鄉

也桂丹菊黃橙香橘綠雖曰瀕洞之餘風景恐猶在也
追謝屐溯王舟與舊遊諸賢偷一二日樂亦有意在而
道遠脚弱徒有此心生翼先到左右耳宇宙無窮人生
如夢某之前言自知其非達者姑發高明一笑

與孫長州令子

某與先正判府寺簿七十餘年交道如一日飛蓬醉卧
之後遇馬先塋有詩感舊便中草草寄和自是書音絕
矣去秋聞訃已哭之寢外猶以老病未能晉言為欠襄

奉薄期先銘下示追頌德業某何敢後特年衰思拙莫能發揚萬一而筋力不任遠欲旅執紼列亦睽所願睇四明之銘旌痛萬官之寔玉道義凜然此忱奚贖惟孝慈亮之

答胡景參

某謂少年相從之樂事不如老來一見之為奇功名路上之逢迎不如溪山境裏之聚晤先生投賢有日矣某亦待盡嵩曲相望只隔片雲乃幾于二十年不相面出

門問天難贖此欠所幸者今為姻家矣某衰年筋力雖難及遠時節交書猶可於五朶雲挹光霽于片言隻字而見心腹而疎濶者又兩年茲拜寶墨未開緘而躍然於其中云云諸兒例蒙存問敬附此拜再三忱諸令子直閣想皆隨侍山中之樂今知有義獻矣就此拜問

又

某謂昏事至重言戒以期禮也主婚之緘千金已訂眷意何渥真染隨之浩浩然自肺肝流薰薰然如顏面對

開明病昧激烈老懷松柏歲寒之盟既如此其綢繆桃
李春風之接當何如其暢洽耶第中間寵辭太過若施
於等而上者凜不敢當闕澗托冗不我訪而以書煩其
令親趙丈一來豈有疑譴及某耶尚望台翰往來中致
其無他之意匆匆申答言不盡意

與趙景魯通判

孟

某不接光霽已十有六年雖心未嘗忘而書不及上近
得兒深信知執事近寓師道處因獲以子弟列叅侍且

拜拳拳隨垂問之辱讀之恍然便如揖面色而話心原也某老矣衰矣而疾病乘之眼如霧手如風形骸如水中枯槎無一分生意矣他又有難言者姑置勿道比緇冠寵賜仰佩謙存某疎濶甚於蓬弱之隔而見遺出於風雨之中蕭蕭數絲之白忽焉增重豈世俗之所可謝也令兄司令郎中令兄架閣想怡聚燕樂皆乞道賤名申敬某日迫淹崦不復問世事諸兒碌碌有緣依托告自時厥後視為河東友記中之物幸甚幸甚略此寫萬

一眼不副心潦畧潦畧

本堂集卷七十八

欽定四庫全書

本堂集卷七十九

宋 陳著 撰

書簡

與廷玉

某白久不嗣書聞雅興甚適兒輩狎擾而有加不倦古道卓卓也近作必富何妨一責老眼雖不能贊其美尚得以自借輝華聞有令郎已魁甚可喜吾輩生事皆狼

猥賢者尚有吟詠之樂而家無啼號之憂某所願聞而自歎其不如也

與王監簿

英孫

某上狀又數載月滿屋梁有夢耿耿朋友西來必道高誼主盟清風標致猶昨日也某向亦有書曾浼一屠丈以達其沈耶浮耶竟莫之詰長兒深入越嘗戒其進下席八拜必辱予潔茲偶遣次兒淪到杭因亦戒詣脩敬亦曰狂瀾滔滔晨星落落後生小子不得見前輩典刑

而何以淑其私況執事表獨立于東南乎敢固以請淪
雖孱弱頗有向學之志儻借一語之寵安保其不為他
日之藉湜某老矣填壑有日於諸兒不无望春風也

與胡景參

某七十八歲之老十日九病之身望赤城在天上自謂
此餘息無復出門之想誰圖機緣以季女托賢郎因而
跋履千巖萬壑既得與杏園舊交一面春風叨禮遇洽
燕笑三日而別歸途未免作惡步步回首山高雲遠不

識尚有再會之朝否惟是某女雖甚醜拙不稱潤玉而私情鍾愛莫知其惡自非有如此舅姑如此家人某豈能憖然于百里之外哉況吾輩三十餘年之契義中間幾成濶絕而今茲愈密愈厚于宿昔自此女始然則造物於此時亦繾綣其可不敬以緝其意脈而不使之有一髮之間尊親家用心某固知其亦如是其又奚辭老荆領諸兒羅拜起居

與胡甥幼文

某別後是日泊於小萬竹次日抵家已申時幸喜達庇
所及也第留三日以病中過厓療視臨分又攜載酌行
感意真甚奴輩奔馳自忙老眼則昏此心則西悽惻可
想而所恃小女諧所託已知在春風琴瑟中此外皆長
物末節不足為吾輩累某亦拜書椿府切至之情亦見
萬分一矣介行草草布悃尚需嗣既

答湯復齋知縣 維祺

某與復齋別十有七年矣自是冬于山水窮處苟延殘

息非不念至交在雲水渺茫外无從問雁隻字不獲上
几格歲癸巳四月廿三日有便來自晦溪忽奉寶緘展
讀乃戊子良月廿五日發者幸而不付之浮沈而越六
年之久人生堪幾六年耶但聞仁人猶不為世運所摧
抑而曰冰寒灰冷正是吾輩分上事及觀對越天地祖
宗一句知吾道砥柱自有人也某荆棘虎狼中倏焉今
是八十歲中間數次病寒疾幾死而壘甕債償未足尚
與重累苟遣子四男三已娶女四三已嫁為日食猥衆

併日藜藿不足至今年則炊無以繼米無從乞朝夕計
已聽之歸溝壑矣近來諸兒忍飢不徹或從學校謀餬
口而亦未易售然則某與執事交談情實豈欲其如是
而至於此皆某身外物也相知滿四方其魯靈光如復
齋能幾浮萍斷梗湖海無涯索索宿草當十之八九天
高地下何往而非煮蒿悽愴之時相望二千里執事年
已七十餘某又年八十矣發此書回又未知何日可到
臨紙無窮銷黯

奉文本心樞密

某耄矣門外事皆不暇問距門牆不為甚遠隻字候鈞
履亦坐曠廢惟寸心耿耿常在丈席間不以衰落間也
先生靈光其身砥柱斯道頗聞時掉葉舟攜壺束菜與
道義交遊山水佳處常是終日可謂樂其自樂非流俗
所能喻某欠死殘息造物者固使之受未足飢寒命也
奈何而猶有忱請某敝廬三間曰喜還堂乃先人久館
於外以晚年得歸為喜取坡詩所謂猿鶴喜君還句中

語以為銘有邵郎中明仲書堂銘在續某又小築三間
予喜還之後取先人易簣時虛中寫示一本字曰汝其
以此求諸已語訖而逝有黃太史震堂記在二堂雖陋
然於先人皆有關係罔極之思無所于寄輒欲累鈞慈
矜軫登龍之舊特為濃墨大字書還喜堂本堂二扁仍
乞燕許筆記喜還并著數語于本堂記之後如蒙特達
從欲其生可以見鄉曲于目前死可以見先大人于地
下相公先生之盛德九天九地也冒昧干瀆拱而俟命

下情不勝戰汗

答王之朝

立孫

某杜門待盡造物者尚留以了齏糲之殘無復望外念
書來乃謂飽與風月盟若有羨于我者何耶海鱗之餽
當與婦輩坐竹樹陰酌茅柴酒和村民唱麥飯歌舉鬻
玉雋頰金以享盛德也執事聞之笑即吾所以報謝者
得辦居山之物耳

與曹久可

漢炎

某不詞興居恍不記時世事日滴我輩星落魯靈光歸
然為吾道執牛耳某則耄而衰病乘之猶能心辦香左
右如不得以殘息時一面何水東流雲西飛可勝耿耿
邪某年事至此不直人唾忍貧待盡而菜甕債未滿祇
益自受苦耳近收文本心樞相書必欲訪求慈湖詠春
詩稿及已易及先叔所刊語錄及別集與時議等梓本
某嘗見之者已歸於燬今則無從訪得之切意執事身
任堂事又居其鄉或有可搜者可錄者乞台念博為之

地或薄有費不妨見示當奉以納蓋此翁屢以此為屬
不容置之不答所以專累尊聽斯文不絕如髮幸而此
翁猶拳拳如此我輩當如何其為心又聞向日劉升伯
曾委作慈湖書院記今還存否亦乞見報某念此等話
頭宇宙間想自有人吾里則如楸山虛谷二老外更誰
領采某已分是旦夕溝壑中物無預此事言至於此天
荒地老日無光矣茲因有城便發此書浼黃壻長孺專
徹清聽仍早求數語回音不惟知前叩之可否有無亦

恐石頭浮沈或不免耳

與單生甫

有立

令嗣

某辱先丈不鄙夷衰耄于邑中垂訪者數且以考深衣
一帙下教某因袖還家將以數語相可否兩年多病因
循未及面決間而聞之友朋久矣其為脩文游於地下
而不敏且山川稍遠弗克盡所以弔送之禮遡風一慟
何以贖此欠茲謾有鈎見書于先迹之末并有二詩效
輓此體愛莫起之或者可徹此心于九京也

答孫興之夢釜

某久別積仰去冬乃塵飛帖勞渠渠且有佳章將以燭
鯽揖清標雋滋味此感狂流俗外也就此韻見回意媿
不能工賢父子書聲道氣浮動東吳湖山間恨不得時
節相聚晤以洗濯老境塵氛有翹望悵悵而已令嗣古
學見之詞章敬羨敬羨使兒輩有緣或者親炙未渠央
也

與胡應之

某與執事異姓兄弟也休戚疾痛皆合相關今乃書問
往來亦是動以歲年隔絕此情當如何度念於我猶之
也衰老貧窮勢自至此人也有天焉惟是近日自西來
者謂雅候得病於深溪絳帳中如風痺不仁且以還鄭
里課伊黃書其果然否我輩年事如許又處約其堪此
耶某又自窘於朝夕又多病病輒瀕死兒輩又為餬口
計去留不常支撐一困於矛頭弩機之上殘陽忽忽秬
自憐耳知君坐病又何以為愛助計徒增哽咽無益也

想二令嗣仍以館為奉親之謀不然又何以資敬養聞小令嗣自長侍左右幸而有任湯藥飲膳之責庶乎其可恃忠介之子能無忝於禮事其家今如何東之已歛衣冠而歸諸坎其後以誰之子嗣之可痛可痛仰之之後或傳粗克自給想不至廢墜厥祀翔父之子必能植立皆所欲聞者聞然翁甚清強光叔得子敬羨敬羨叔開諸兄須皆時時聚首望小令嗣一一以片紙報及疇昔每有過嶺相會之約今度筋力皆無及矣但或偶有

便到敝里則以數字報平安乃幸仁里諸君子尚足為
吾道壽元氣非他處比皆執事諸前輩陶鎔以至今日
其所深敬紙盡姑畧所欲言

與越悟本寺主僧文蔚

某兒曹歸自越篋中赫赫有光發之得飛章和吟讀之
如雪淪唱風掠醉平生快也且荷山齋起衰服之便覺
生羽翼託交淺知我深八十三歲之外安得更苟數年
活與師以片紙往來哉因筆四句師歸古越老梅根我

住小丹山下村贈我金丹知有意要生羽翼到雲門聊
發一笑

與浦江龍德寺主僧妙資

某繇涌水望浦江千里而近雖未及識面而獲聞名是
心已夙契矣屬以寺記年毫本不敢承諄復來諭且傳
岳叡陳霽月之意尤至勉強按圖狀而書之茲以稿去
幸視其入區區為人著筆自知無金石體若夫運思其
間亦各自有見或曰可也則用此稿不然則望擲還母

徒留置之几格兒子歸時須得數字以報

與湯復齋

某自丁丑歲於驚風駭浪中執手遠別無從問訊至癸
巳四月廿三日忽晦溪領寶緘乃戊子良月廿五日所
染者幸而越六年間不浮沈也但聞仁人不為世運所
推抑讀到所謂冰寒灰冷對越天地祖宗一句某為之
感烈今已八十三矣與荊棘虎狼出入幾死者百數而
齎竇債償未滿苟存殘息四女四男尚有一男一女未

畢婚嫁向平之擔未脫真卿之粥屢空草衣木食山水
間一老猿耳尚堪為知者道耶遙想執事日來目前事
稍寬於前諸東閣必自能支撐不如某之無聊賴之極
也既壽而康到此三茅山密邇小車短策時一登覽亦
可舒暢身外事皆浮雲于我無與焉相知滿四方萍浮
梗泛宿草索索何往而非煮蒿悽愴之時執事乃魯靈
光也相望二千里彼此皆下春光景相見必無方來之
期茲因王直溪由台校暫還錦得奉此書衰耄昏花不

成語不成字當恕其直朴直溪回望筆數字報凡百之
悉或有漫塘先生文集辱惠我一帙亦欲時一披玩當
飢餓中滋味也如不暇印則置之勿以過累台抱某領
賜書次嘗繼修尺牘為報頗聞不為達聽今此便却端
的甚與下意契逢故懸懸望回音

與陳立可

誼高

某不拜狀又一年寒暑自代謝道義無故新有時風清
月明便如面接色笑況兒淪每道文字況耶某今年八

十有三雲託所逮第相望各天一涯無從縮地脉諧一
見今兒子又離台未知書音又如何老境遇事悽愴況
知愛之深而生死在一息間其感惻又非尋常比興言
及此執事將亦一長太息也雙明犀一愛玉聞甚可喜
且館業為家從容無促數意皆所願聞某所苦者在累
重粥料至今日愈難辦但某若溘然却非夭亡餘累則
聽之耳數百里外有可教者勿外或魚雁有便靳一寄
字

與胡景參

某托親且契非他人比連年不及以隻字登几格雖曰
耄境坐息亦知其能亮我以真而不以流俗訝也令嗣
來與小女二子偕父子多年不見歡聲滿庭備諗雙慶
堂前無一毫責備意薰薰然度日於春風時雨中是以
小女得於冢介間承順顏色某舉家為之榮感某年來
朝夕應酬與數年前絕異高明不問而可悉但所幸者
門戶無半點囂塵亦一貧所賜也時有少文字之冗本

非其腔江空歲晚人物皆歸宿草獨某齏齏未乾造物
見罰而或者妄以為可近亦歸軌揮手謝之矣庶幾免
血指汗顏之誚聞親家青山流水閒花野草日與之醉
吟醒玩而諸蘭玉芳菲其左右既壽而臧齊眉偕老古
所謂神仙不過如此今為何日誰有此樂回首三十年
前時節聚晤青雲在眼飛黃而翼知有如今各天一涯
夢亦飛不到也交道滿四方猶幸吾二天得以親戚不
至斷消息耳頗知南麓高年悼亡猶未了定事且生事

淒涼吾輩有泯默而已誰能陽春之哉宇宙納納風雨
瀟瀟大抵若此獨誰問其方來哉姑付之忘言茲因令嗣
回侍綵旁匆匆拜數字當起居

與吳山甫

垓

某追念執事之喪其子為之心寒獲見執事之有其子
為之心敬寫之辭以哀之老夫不妄為人著語者而此
辭雖非文然其中隻字皆古道庶幾慰執事之鍾愛幸
令嗣之全歸而使世之徇俗無所知者或可感悟亦名

教中之一助嗚呼禮自聖人出而人猶敢玩視使或出
於後世之妄流則將蕩然矣吾為此懼而猶喜者有吾
鄙在

與竺梅潭

某昨方拜答狀茲得以畧天一夜風雲數點雨六花已
有訊息矣紅爐擁雪白首齊眉此時正是親家樂處無
酒為意薄脩湖鯽二十尾或可開剡雪樽齏橙縷肉為
我一醉乃所望也

與林國器公輔

某不拜狀已久每思軒豁襟懷優寵禮遇山林衰老何以辱此迄今雖心有所感激而莫之報所諭象元二字合當有老子之語若改先為元則斷不可前記亦是遷就之說雖某本心茲承尊誨改削但望詳細開教庶不負委使但于長孺便寄數字足矣雉雞曾買得活者一隻三日而望藥鼎而升矣更欲買則或雄或雌不成對捕者以最難養此物若非素養之雉野性終不可馴更

待來年又與捕者求雉方可承命此末也而不克如意
古人獻白雉又何從而來哉可笑其疎拙

又

某不拜詞久矣非敢故簡為自五月凡更數病而痺疽
自涉四個月方愈則下部膀胱作楚見服藥未效一貧
如此造物又困我以病有死而已但遺二百指以溝壑
則不能不顧後也秋風正涼琳宮瑤館足以夷猶以昌
詩酒之興第諗鰲首浮山又將在日月湖之間可謂天

福其物外樂也某已無分可入邪深恐不能不累請重
數言以挽其入九泉耳象元觀記又已脩改數字竟取
名章二字庶幾渾成若夫直下流傳一字記中已力說
矣自無可易尚在大手筆自斟酌去取之至祝敬拜尊
眷仙況日長家人羅拜意二令嗣為學必日進亦老親
知之所拳拳也病後未復且下部痛煎筆不成字且乏
紙不謹

答應誠則

文明

某言別又一載遙邈讀禮之居與雲俱東書來存勞孔至感愧感愧先丈墓銘深懼不能發揚幽光命戒之嚴不敢不承衰耄拙澁賁而不文然于平生相知則在是矣君貴回西席就藁內幸視入某自夏五病至今猶未脫而下部之崇尤可畏奄奄氣息已在崦嵫之外尚堪為知己道邪先丈喪事或有期意甚欲一執紼度已不可動又看造物如何

答陳楸陽書監

榮寵

某河梁揖別風淒日薄一月聚晤之樂便成百里隔正
是難為情書來辱所以勞苦良至鄉心宗義自與泛泛
不同感感王松石下訪某病痺且戒二兒肅入第薄莫
急回六詔不留款已約歸邊重到某却當面話一餉也
地頭度亦無他幹況非可久留之地須即翩然東舟某
顯候顯候特今偶病間窓暄可以握筆預作此字以候
故未知松石所相與言之畧竹初門下士決非噲伍亦
欲叩其一二特家風寒極恐無以見雞黍禮耶然吾輩

意氣終勝流俗或不在此也執事必以老丈先賦解嘲
為笑孔自軒的是何日行亦欲見和詩當贈遠未曾落
紙不及就此便見次先道意此丈可敬不辱其先正樞
相吾鄙與有光焉嗣或有便亦欲聞新事尚不我外幸
甚

本堂集卷七十九